

四庫全書

史部

欽定四庫全書

平定金川方略卷六

三月丁亥

上命軍機大臣等傳諭班第曰據班第奏稱先由成都起程往川西一路查看糧臺前至軍營再由軍營前往川南一帶勘視糧路朕思辦理糧餉固屬緊要自應及時籌辦但軍營弁兵多半更易現在正值軍興恐張廣泗一人有不能兼顧之慮班第

若至軍營且不必查勘糧路在彼留駐多時既可  
察看情形又可與張廣泗協商一切軍務佐其不  
逮其糧餉一事即於軍營指示調度一面辦理至  
金川逆酋進勦前據張廣泗奏稱各路兵到一舉  
攻克夏秋之間可以告捷此處應令班第留心察  
看果如張廣泗所奏夏秋之間可以告捷則已萬  
一揆度形勢夏秋之間又不能竣事遷延至於明  
歲則應另為籌畫為先事圖維之計朕思金川小

醜本非難以殄滅祇緣綠營兵弁素多怯弱川兵  
又於隨征瞻對漸染委靡習氣以致不能振興若  
改用旗兵前往或者可以剋期致勝應令班第與  
張廣泗詳酌張廣泗本係旗人即管轄旗兵亦無  
不可但此時且不必露此意恐衆志益懈也

庚寅雲貴總督張允隨貴州巡撫孫紹武提督  
丁士傑會奏言上年五月間准川陝督臣張廣  
泗咨調黔省官兵二千名協勦臣等因官兵入

川之時正當夏月一交冬令天寒必須製備皮衣隨會商每馬兵一名借給銀四兩步兵一名借給銀二兩計黔兵二千二十一名即於藩庫借支銀四千四百八十兩並借給領兵將備製備冬衣銀六百九十兩共銀五千一百七十兩於十月十五日委官解赴川省去訖旋准張廣泗咨稱黔省兵丁皮襖皮褲在所必需已酌定每兵借支銀三兩就近於成都借給銀六千三

十六兩希即照數委員解還當即轉飭前次委員將領解銀四千四百八十兩即徑交川省藩庫兌收其應找銀一千五百五十六兩俟有便員即行補解伏思黔兵遠赴蜀塞其家口在黔全賴月餉養贍若遽行按季坐扣未免匱乏堪虞臣等仰體

皇上軫卹戎行至意公同酌議將前項借支銀六千三十六兩並領兵將弁借支銀六百九十兩統

俟凱旋之日在於各官兵俸餉內分季扣還奏

入

報聞是日張允隨等又奏言正月十五日接准川陝  
督臣張廣泗來咨加調黔兵一千名赴川協勦  
臣等當經會商於各標協營酌量地方情形兵  
數多寡派撥足額選委平遠協都司呂文魁黃  
平協都司沈瑞龍分為二撥管解前進呂文魁  
人材壯健任事勇往而沈瑞龍於塞外地理情

形亦頗熟悉俱屬軍前可用之才至於新疆協營均資重兵彈壓未便議調惟清江協副將唐開中係張廣泗指派統領官兵大員所有該協親標兵丁不得不酌調九十五名餘派撫標一百名提標三百名安籠鎮標一百名遵義協標一百五十名都勻協標一百名大定協標五十名平遠協標五十名黃平營五十名丹江營五十名以足一千之數仍按每兵百名准帶餘丁三



十名以備背負軍裝貼防壁壘之用已於正月  
二十至二月初一等日陸續起程俱交副將唐  
開中統領前進奏入

報聞

壬寅紀山奏言前准督臣張廣泗委員在省製  
造五六百觔重大鐵砲二十位又添造六十位  
共八十位正因所購鐵觔不能應手恐致貽誤  
適因督臣前札令臣在雲南雇覓鑄銅巧匠五

名俟九節銅砲到川照式鑄造今砲匠恰值到川臣即動錢局銅觔仿照督臣飭造鐵砲大小試造一位銅觔重於鐵觔故試造之砲體重七百四十觔長七尺三寸食藥一觔八兩食鐵子重三觔四兩隨即運送軍營去訖茲于二月十四日工部員外郎石禮嘉等將奉

旨頒發九節大銅砲十位運齊到省是日即准督臣咨令將大銅砲五位運至軍營二位運送打箭

爐二位運送雜谷關留一位在省即令滇匠仿照試造至所需鐵砲八十位既有九節大銅砲十位止須四十位臣當即遴委幹員分頭護送並令滇匠仿照九節大銅砲式先行鑄造至鐵砲尚應解十四位刻下現在趕造俟造成試放之後隨得隨運恭摺陳明奏入

報聞

甲辰陝西延綏總兵何祥書以派撥兵丁往川

少撥馬兵騎馬三百五十匹具摺請

旨議處

上命該部嚴察議奏

乙巳張廣泗奏言臣欽奉

上諭令臣於各省司道鎮將內有深知其可任者聽

臣一面調赴軍前委用臣自揣素乏知人之明

何敢以非臣所屬遽行移調惟原任貴州按察

使宋厚其人才識明通老成歷練於苗疆軍務

經辦最久西鳳協副將任舉奉

旨發往軍前其人忠誠勇敢現在川省鎮將內無出  
其右者此外臣現調陝甘雲貴之兵需員統領  
業經指名派調陝西金塔協副將劉順大通協  
副將高雄潼關協副將鐵景祐貴州清江協副  
將唐開中雲南鎮雄營叅將龍有印並候補叅  
將王愷數員或向曾共事或得之採訪尚屬諳  
練戎行者統俟該員等到後容臣再加察看至

川省各官積習一切粉飾欺誑成風巡撫為一  
省樞紐有轉移風氣之權愛必達存心醇正堪  
任川撫否或以愛必達調任黔省而以孫紹武  
調任川撫似乎均得其人奏入

上命軍機大臣等傳諭曰據張廣泗奏川省積習官  
無大小事無鉅細一切粉飾欺誑成風要在大吏  
實心整飭懇以愛必達用之川省固可轉移風氣  
或以黔撫孫紹武調任川省而以愛必達代伊黔

撫之任看來紀山未必能勝巡撫之任但愛必達  
朕甫用為浙江巡撫未便遽為更張且川省軍務  
紛紜目下正值辦理糧餉驟易生手亦恐於事無  
益紀山著暫留川撫之任令其與張廣泗同心實  
力共襄厥事是日

上諭內閣曰原任貴州按察使宋厚不必來京著速  
赴金川軍營以原銜聽總督張廣泗酌量委用遇  
有缺出奏請補授是日張廣泗又奏言臣准廷議

以副將胡大勇請將雲南淨瓶銅砲四五十位  
解赴軍營之處交臣酌量臣查滇省淨瓶銅砲  
原係摧堅之具但此間攻擊礮樓須在千觔內  
外始克有濟是以臣於上年十一月內奏請貯  
京之九節銅砲業蒙

頒發十位解送軍營又募匠照式鑄造又有成都現  
造之大劈山砲已敷攻礮之用所有前項淨瓶  
砲位祇須令現調之雲南官兵隨帶數位以壯



軍威無庸多帶以滋糜費解砲既少副將胡大  
勇亦無庸赴營可也奏入

報聞

戊申

上諭內閣曰據調任四川按察使鄭遠奏稱年近七  
旬精力漸衰川省邊郵要區懇請來京請訓鄭遠  
年力將邁看來難以遠赴川省著准其來京陛見  
酌量改調近地四川按察使員缺著宋厚補授是

日陝西巡撫陳宏謀奏言三月初三日准川撫紀山咨稱遵照廷議請即在於陝省酌留封貯銀內動撥六十萬兩委員速解來川備用臣於二月十九日接准兵部咨會已據撥解戶部餉銀一百萬兩分作二起解送四川協濟川撫紀山尚未接到部文是以移咨陝省就近借撥但部撥京餉此時尚未抵陝恐川中緊急需用自應先就陝省協撥行據布政使慧中詳稱陝省

原貯酌留銀四十萬兩因奉調官兵出征金川  
動撥供支現止存銀三十四萬兩此內尚有各  
府州縣墊給軍需應行支領還款必須酌留備  
用今於陝省酌留封貯銀兩內動支二十萬兩  
委同州府通判趙銓按察使經歷章時慎即於  
三月初五日星速起程解赴四川撫臣紀山衙  
門訖至部撥頭起京餉諒亦不日到臣俟一  
到陝境即時護送前進不致遲悞奏入

上諭該部知之

四月甲子

上諭內閣曰金川軍務歷時許久尚未就緒總督張  
廣泗歷練軍情尚書班第專司籌餉現在竭力辦  
理各省官兵亦已調集但此番狡寇負固猖獗非  
尋常小醜可比應特遣重臣前往提挈綱維相機  
商度乘時策勵則軍聲振而士心一及鋒而用可  
期迅奏膚功大學士公訥親浙江查審事竣原令

就便查看山東賑務今思軍機尤為緊要訥親着  
即速來京給與經略大臣印信馳驛前往經略金  
川軍務是日

上又諭內閣曰大學士訥親命往金川經略軍務往  
返需時內閣滿洲大學士人少著尚書傳恒協辦  
大學士事務是日

上又命軍機大臣等傳諭張廣泗曰金川逆酋不法  
朕命張廣泗統師進勦深入蠻荒一切經營控制

可謂殫竭心力伊在黔時上下一心苗民安輯乃  
自到川以來王師久駐尚未奏凱揆厥所由皆緣  
瞻對用兵之後川省將弁兵丁習於欺朦怯懦以  
致士氣不振不能速奏膚功張廣泗急於告捷竭  
力董率在營將士因其督責過嚴未免人懷怨望  
此種情形皆屬軍營所有之事朕思金川大肆猖  
獗固非尋常小醜可比且各省大兵雲集控馭調  
度祇資一人獨任恐精力亦有不逮是以命大學

士公訥親前往經略統領禁軍及各營將士以壯  
聲援俾軍令肅而士氣奮委靡退縮之習不敢復  
萌於中而張廣泗又得專意征勦省一分籌度之  
心即加一分進取之力庶幾事克有濟目下徵兵  
已至刻期進討如訥親到時尚在征勦金川正可  
資其威略殲滅醜類可傳諭張廣泗諸凡同心協  
力務期早得渠魁速殄羣醜俾番蠻懾服咸知向  
化一勞永逸以紓朕西顧之憂

臣等謹按金川小醜戕虐同類我

皇上胞與為懷惟恐一民一物不得其所土司雖屬  
羈縻亦不忍坐視其困凡茲聲罪致討原非  
利其土地人民因張廣泗向在苗疆熟嫻軍  
旅著有成績是以委心任用乃出師征勦已  
幾半載膚功未奏

聖心軫念獎勵多方又恐其獨任為難

特命大學士訥親前往經略謂張廣泗得省一分籌



度之心即加一分進取之力委任之專體恤之切如此其至至訥親位高祿厚平日受

恩優渥中外無與比倫膺斯重寄自宜仰體

憂勤之念冀紓

宵旰之勞

聖諭所謂資其威略殲滅醜類是必先聲實足奪人

決策果堪制敵士氣則委靡悉振大帥則駕

馭有方將使靖掃蠻氛

朝廷永無西顧之慮庶乎克稱任使者即可不負  
恩遇也

戊辰

上諭內閣曰從前派往瞻對軍前之大臣侍衛執事  
人兵丁等並未効力今因金川用兵命大學士訥  
親為經略總理軍營一切事務仍派內大臣班第  
及從前所派侍衛執事人兵丁等馳驛前赴軍營  
聽公訥親指示効力贖罪並派護軍統領賽音圖

烏爾登法酬御前三等侍衛鍾秋乾清門三等侍衛胡西前往亦聽訥親指示以教訓約束綠旗官兵前次所派人員內如有患病事故不能前去者著軍機大臣等另行選派此所派人員仍照前例分作三次令其陸續起程

癸酉張允隨奏言正月十七日接准川陝督臣張廣泗咨調雲南官兵二千名當即檄令鎮雄營叅將龍有印統領官兵並派開化鎮標中軍

遊擊劉德成昭通鎮標右營遊擊楊朝棟分領  
進發茲聞報叅將龍有印於二月二十七日在  
四川永定縣病故臣查分領官兵之遊擊劉德  
成諳練營伍曉暢軍情年力富强有志向上堪  
膺總統之任隨即飛檄劉德成署理鎮雄營叅  
將總統滇兵星馳前赴川省軍營聽候調遣奏  
入

報聞尋經張廣泗復以龍有印病故疏報

上悼惜之

乙亥張廣泗奏言軍前各路官兵駐守情形臣  
已於二月初七日恭摺奏報月餘以來防禦周  
密賊俱未敢前來侵犯惟據馬奈駐營之領兵  
叅將永柱遊擊楊之義李璠等報稱三月初五  
日定更後賊兵來撲我軍之左水卡並河東申  
達溝之日角礮寨漢土官兵奮勇對敵殺死賊  
番七名擒獲二名業將河東賊番擊退惟河西

約有賊五六百人修理石卡二十餘處攻擊未  
退三月十四日賊從卡卡脚蜂擁而來我兵用  
大砲衝擊二更後賊始退去四更時復來撲營  
我兵奮勇抵拒擊死賊番現存賊尸二十七個  
生擒二名十七日黃昏又有賊十數人撲卡千  
總審法武領兵將賊擊退追至半山被鎗子中  
傷陣亡又據稟報二十二日三更賊來連撲水  
卡二次俱被我兵奮勇打傷賊人血跡甚多二

十三日辰刻約有二百賊陸續遁回現在乘  
機攻勦臣又遣發官兵八百名前往助援並添  
發川省新造大鐵砲以資攻擊日內諒能退賊  
無虞也又據駐營卡撒領兵之高宗瑾唐開中  
與叅將買國良聯銜稟報有賊番大頭人生格  
素稱狡黠曾經愚弄張興被陷三月十六日帶  
領賊番來營口稱投誠該副將等密諭守備馬  
國材設計擒獲其跟隨之衆欲行搶奪被我兵

鎗砲齊發擊死十餘人賊始奔潰該副將等將  
賊目生格押赴軍營已經嚴加收禁至臣加調  
陝甘雲貴四省官兵現在貴州陝西固原河州  
西寧寧夏之兵已抵軍營其延綏甘涼肅并雲  
南官兵亦據報陸續出口約於四月初十內可  
以齊抵臣駐營之小金川再為分路遣發各應  
進攻之地計在四月底舉兵正當賊地刈獲之  
際我兵鼓勇齊發四面力攻賊勢倉皇料難兼



顧庶可搗其巢穴也是日又奏稱本年正月二十一日高宗瑾擒獲生噶爾結鎗砲擊死頭目一名彼時臣尚未悉已死頭人係何名目是以未經聲明嗣將生噶爾結及續獲之生格均加訊問始知其名阿撒拉亦係莎羅奔所親信之人就擒之生噶爾結現在嚴行收禁至孫克宗土兵現已全行遣回並無仍留軍營者馬良柱倉皇移師遺失軍裝砲位自應遵

旨糾叅以肅軍紀宋宗璋員缺俟哈攀龍到營即遵  
旨令其署理許應虎始將効力軍營之

旨秘而不宣既為南路統領有過無功當遣回本任  
至岳鍾琪為人色厲而內荏言大而才踈然遇  
事頗有見解昔於進藏及平定青海立功附近  
番夷聞其聲名頗為畏服即金川莎羅奔亦係  
伊招納始行給與土司印信若任以金川之事  
實屬人地相宜臣謹會同班第遵

旨調赴軍營俟其到時擬令前赴黨壩統領官兵兼  
管綽斯甲一路黨壩現有漢土兵八千餘名應  
再添給二千以足一萬之數綽斯甲河西一路  
現有漢土兵三千餘名亦應再添給三千以壯  
聲勢至金酋現能出戰之番人實止四千以內  
糧食惟勒歪足供一二年食用刮耳崖不過四  
五月之糧屬下番民止以元根充饑甚多怨望  
看來斷難久持將來兵鍾琪至彼逆酋計窘勢

窮之時自必往投乞命便可就計成擒奏入

上命軍機大臣等傳諭曰據張廣泗奏報現在軍務情形各營駐劄逼近賊卡屢被侵犯雖間有殺傷而賊番並未大創看此情形是彼據險扼要轉得乘我之隙以逸待勞以寡擾衆而我軍應接不暇不能制敵而反為敵所制矣即如賊兵連次侵犯下水卡該處原駐重兵何以又調助援官兵八百名之多且大兵業已將次調齊而賊衆全無畏懼

該督不能選銳進攻奪取要害僅以堅壁為自全之計遣兵為策應之方其平日之調度機宜何在師日老氣日怯何時可圖進取殊可厯念至擒獲之生噶爾結生格二名又稱現在嚴加收禁此等就擒番目審訊明確應即在軍前正法以洩衆忿且可震懾番情若果係渠魁應俟凱旋獻俘之犯則當解送成都內地監禁尚可不致疎虞今即在軍營拘禁倘逆酋知其尚未伏誅妄思索奪豈不

又生事端可傳諭張廣泗作速辦理又據奏稱岳鍾琪至彼逆酋勢窘計窮自必往投乞命便可就計成擒莎羅奔狂狡負固罪大惡極如果窘急投誠自不待岳鍾琪方能設伏掩獲但從前張廣泗早有不准投誠之語此時即欲誘之使來彼必不信岳鍾琪素為番人所服新至番地或可設計擒弋此固因王得羊亦一機會可否如此辦理著張廣泗酌量相機調度但不可為所愚弄致令兔脫

一并傳諭知之

臣等謹按張廣泗於張興失陷之後畏憚恒怯自正月以至四月各路僅皆固守並未攻擊張廣泗亦不催令進剿惟靜俟所調各省官兵

聖諭所云該督不能選銳進攻僅以堅壁為自全之計遣兵為策應之方平日之調度機宜何在實屬切中情形有如燭照此經略之

命所以不容已也訥親若果能展謀猷有以懾服張  
廣泗之心而左右提挈之出其平日制勝之  
才振其目前委靡之氣則功成固有可必矣  
是日

上諭內閣曰岳鍾琪前在西陲用兵以失機致罹重  
辟久繫囹圄朕加恩放還鄉里今當金川用兵  
之際因思伊久官西蜀素為番衆所服若任以金  
川之事自屬人地相宜曾傳旨班第張廣泗酌量



如果可用將伊調至軍前以總兵銜委用今班第  
張廣泗已遵旨調赴軍前岳鍾琪著加恩賞給提  
督銜以統領聽候調遣予以自新之路俾得奮勉  
圖功以收桑榆之效如果即能迅奏膚功更當從  
優獎敘是日

上又諭內閣曰許應虎來京陛見時朕觀其人有勇  
敢之氣向在苗疆著有勞績似屬諳練軍情是以  
加恩賞給路費准其攜帶伊子馳驛前赴金川軍

營効用伊自當感激圖報竭力奮勉乃據張廣泗奏稱該鎮抵川竟將奉旨赴營効用一節隱秘不宣意欲竟赴建昌鎮任及臣奉到諭旨飭令為南路統領該鎮急遽冒昧毫無調度以致蔡允等失去砲位又攻寨不能克取縱放已降番目回巢致令圍困營盤經臣親赴救援賊始解圍又令同高宗瑾據守卡撒而該鎮畏賊如虎稟懇依賊所言撤營讓地經臣嚴檄始定臣恐搖惑軍心撤回隨

營駐劄且年已衰邁無可任用應令回任辦事許  
應虎深負簡用之恩仍令回任何以警軍前之不  
用命者張廣泗所奏非是許應虎著拏送來京軍  
機大臣等會同該部嚴審定擬具奏是日張廣泗  
又奏言軍行糧隨輓輸最關緊要山徑崎嶇之  
地馱載難行必須人夫背運至有力之家未肯  
親身應役則須催倩鄉里傭工代行幫貼之費  
在所不免即從前雲貴等省苗疆用兵莫不皆

然惟川省官員推諉性成而民間尤昧大義率以派僱為苦地方官又並不明白勸諭輒令里民折抽夫價解至省城交成都府代辦聞已收銀數萬兩臣來營之際又據司道等稟稱通省各官公捐養廉一萬五千九百餘兩以助僱夫之用臣查此次軍需業蒙

皇上節次動撥帑金前後三百餘萬豈藉此萬餘金之養廉足補涓滴且恐明啟地方官以諉卸辦

夫之端隨轉行禁止去訖伏思各屬既有幫價  
解交成都府代辦則夫役價值自必增添而未  
見糧夫稍有從容之象臣昨面詢撫臣紀山亦  
祇含糊回答不能實道其故請俟

欽差尚書班第查閱糧站回川之便

勅令就近確查前項里民幫貼價銀實在收過若干  
係作何公用並應否收納之處請

旨訓示遵行庶私弊可杜而運夫亦不致缺乏奏入

諭曰此事即交班第亦不能查出今命訥親為經略  
即交伊查辦必能水落石出也是日尚書班第張

廣泗紀山會奏言臣班第奉

命來川調度糧運謹將現在情形悉心會議條例敷  
陳如兵丁官役宜酌量支折以省軍費也軍糧  
現蒙

恩准每人日給全米一升塞外米價昂貴若照例折  
支兵夫未肯舍多領少則需米浩繁用夫既衆

輸輓愈難今核算運米抵營每石需銀十二三兩至十五六兩不等應請酌中定值就各路軍營道路之遠近分別八兩九兩折給俟將來進抵賊巢俱以每石十兩折支凡各路文武官弁跟役及土兵在本境而未離巢者概行半米半折計可省口糧六七千分其官兵及餘丁砲夫並土兵離巢者原應日給全米倘有情願折支者亦聽折領至各臺站之運夫口糧原領折色

者計算出口程站遠近酌量增減折支如此則較之向例所定折價雖不無少增而合之全給米石所需運費又實屬節省况折色可多則運數可減既省官運亦抒民力又內地運夫口糧宜酌量加給也現在內地運糧自雅至爐十三大站山程陡峻每夫背米五斗給腳價銀一兩三錢二分五釐其餘州縣道路平坦者給腳價銀五錢概無食米價值本無短少但各州縣距



口遠近不等有自十餘站至二十餘站者運夫  
既難裹糧自隨勢必沿途買食無復餘資以養  
家口臣等仰體

皇仁請於給價之外每站日增給口糧一升由沿途  
州縣存倉穀內碾米支給存倉價銀每升不過  
六釐而窮黎得省催價以贍家口矣又口外最  
險糧站宜量為加賞也定例負重之日每夫給  
銀八分口糧一升回空之日止給口糧不給夫

價但由陶關出口即有天赦納凹鄧生班攔及  
空卡丹噶等山由保縣出口即有華蓬商角及  
直固陡柔谷噶美卧夢筆等山俱層峯險峻春  
夏積雪徒手猶虞困躋運夫往往畏避不前每  
致糧多壅滯是以承辦糧員於各夫負重之日  
照例支給外至於回空則無分本日次日抵家  
均給口糧一升再於天赦納凹班攔三站每夫  
負重之日增給賞銀二分鄧生一站增給賞銀

一分各夫始樂從事是皆於遵例辦理之中不得已為權宜之計仰懇

聖恩即准照此辦理又臺員宜間設丞倅州縣以司稽察也川省從前用兵糧運惟設總理糧務道一員其餘臺員悉用佐雜今次既分西南兩路運糧蠻夫不敷應用又添調內地人夫未免漢蠻參雜僅用佐雜微員不堪彈壓應於兩路臺站每三臺中撤去佐雜另選幹練勤慎之丞倅

州縣等官一員為正糧務責令總理稽察三臺  
似覺整肅再查南路總理道員因添兵加運人  
夫衆多應照西路之例設立副總理知府一員  
即委雅州府知府就近專理以上四條皆關糧  
運緊要謹一面飭辦一面奏

聞奏入

上命軍機大臣等會同該部速議旋經議覆准行是  
日又

命傳諭張廣泗等曰據奏軍前跟役及土兵在本境者酌令半米半折軍行最重糧米今議半米半折倘米有不敷伊等縱有折價從何購買且蜀道艱險商人運販腳價勢必較官辦更為昂貴何以折色轉足以資食用可傳諭詢問張廣泗等詳悉確查具奏是日班第張廣泗紀山又會奏言臣等遵旨閱四川副都統卓鼐奏摺內稱雜谷等土司所轄蠻民家口數萬山多地少所產之穀僅敷半年

食用每歲於九月收穫之後約計五六萬口皆入內地傭工現因金川用兵禁止入內恐至青黃不接之時乏食滋事不若催令運糧又稱安臺運米官定腳價每米一石每百里給銀一錢計算每夫負米三斗日行四十里僅得銀二分二三釐實不敷用查卓鼎所言運價乃係內地情形並非口外現辦之事內地路途平坦食物不貴是以所定運價每石每站給銀一錢若口

外則每夫運米五斗日給腳價銀八分口糧米一升與內地不同至於雜谷等處蠻民於收穫後入內地傭工者名為下壩相沿已久上年因用兵金川是以禁止下壩早已給與口糧腳價調撥運送軍糧並無乏食滋事之慮奏入

報聞是日

上以大學士公訥親經略金川軍營令主事何曰熙  
隨往

戊寅

上命傅爾丹為內大臣兼鑲黃旗護軍統領馳驛前  
往金川軍營効力是日

上諭內閣曰內大臣傅爾丹年老著伊孫哈寧阿隨  
往照例馳驛是日

上又諭內閣曰任舉所奏之革職千總富德把總晁  
宗志俱著賞給原銜給與驛馬隨大學士公訥親  
前往軍營効力如著有勞績再行請旨



臣等謹按富德晁宗志已革千把微員耳乃  
任舉一為推薦

皇上即命馳驛前往効力尚許以著有勞績再行請  
旨

聖主之於人才留意鼓舞真無微不至也

五月丙戌湖廣總督塞楞額奏言四月初七日  
准川陝督臣張廣泗咨調叅將管長安營遊擊  
事劉策名赴營差委臣即於是日飛檄該將迅

速起程由貴州取道徑赴軍營聽候差遣訖奏  
入

報聞

戊子紀山奏言臣於二月二十八日自省起程  
前赴軍營與督臣張廣泗面商事宜沿途督促  
輓運稽察臺站於三月十二日抵小金川美諾  
軍營二十二日在軍營起程回川由孫克宗得  
奈章谷之兩河口毛牛一帶督催糧運於二十

九日到打箭爐查看各路情形尚屬源源輓運  
但查爐口為南路糧運總匯一由泰寧字龍運  
甲索軍營道路遙遠恐將來添兵必得加運一  
由章谷分運馬奈軍營雖據該糧務三月摺報  
現在運到米糧千有餘石亦須多運方為有備  
臣俱面諭建昌道陳緯加緊趕運以裕兵食一  
由章谷協運孫克宗軍營必由兩河口過渡此  
路依灘傍澗水易泛漲五六月間大雨時行深

慮阻隔亦經臣面諭陳緯將來發水之時應否  
歸併川西輓運務期豫籌妥協至爐地米石皆  
賴雅郡發運從前自雅運爐每米一石官給脚  
價銀二兩因該地於瞻對案內運米至今民力  
未免疲敝已准部咨覆每石增銀六錢五分運  
夫現俱踴躍從事其各府州縣派撥運雅之米  
臣又飛飭水陸並進接續抵雅以資轉運尚有  
分運木坪一路軍糧雖現在竭力輓運究不敷

原派之數經臣飭派添夫一千名已據報到站  
趕運此南路糧運之情形也至川西草坡一路  
因奔拉雪山險隘異常兼有瘴氣運夫多有逃  
亡病故者又添調新兵及隨軍輓運之丁已兩  
次飭司添催夫八千八百名又由保縣出雜谷  
開轉運黨壩一路雖據該糧務三月摺報現有  
軍糧三千餘石但該路軍糈原有續派松潘鎮  
每月協運米麵二千石松潘近處極邊倉貯不

宜空虛臣檄飭松茂道唐進賢轉飭保縣多方設法加倍運黨如可不需松糧即行停其協運以重邊儲又從前於曾頭溝一路運糧直達美諾軍營尚嫌太近賊巢今改由商角山一路甚為妥便此西路糧運之情形也以上兩路約計每日共運米六百餘石尚無貽誤再各臺站俱在衆土司界內蠻民亦俱出力幫運而沃日土司納爾吉并伊姑策爾吉尤為出力臣經過其

地目睹田地大半荒蕪碉寨多被金川殘毀因  
加安慰開諭捐賞銀五百兩並綢緞銀牌等物  
以固結其心又打箭爐明正土司自瞻對之役  
供應烏拉輓運軍糧上年復被金酋侵擾此次  
用兵以來應差應役又經一載該土婦喇章率  
伊子德昌鼐勉出力始終不懈實係土司中之  
難得者臣過爐之日亦多方慰勞賞賚以示優  
恤其餘經由之處各土司俱屬恭順奏入

報聞

壬辰

上命軍機大臣等傳諭大學士公訥親曰大兵征勦  
金川各土司盡心出力丁壯事軍旅老弱轉餉糧  
共切同仇始終不懈沃日明正兩土司既殫竭勤  
勞其餘衆土司亦多屬恭順甚為可嘉著傳諭大  
學士公訥親令其將効力戎行供應烏拉輓運軍  
糧之各土司查明經由地方功績等次先行傳旨



嘉獎並向來輸納貢賦或應免其稅糧或應優以  
賞賚其如何加恩之處逐一詳議即速奏聞是日  
張廣泗奏言本年二三月內官兵駐守情形業  
經奏報茲半月以來各路營壘謹嚴賊無侵犯  
惟馬奈附近之戎布寨自去年九月因番目恩  
錯復叛至今官兵未能攻克賊復於馬奈山梁  
之北安砌石卡以為戎布聲援今據該處領兵  
叅將永柱報稱四月初五日二更後遍山皆賊

永柱派兵直赴賊卡攻擊守備楊錦把總靳天爵外委鐵中奇三員奮勇爭先領兵七人先搗賊卡手刃賊番十二人鐵中奇又生擒一人各官兵隨後齊到奪獲賊卡二十三處生擒賊番四名奪獲刀鎗長矛火藥鉛彈等物共殺死賊番一百餘名帶傷者不計其數有把總楊生吉力戰殺賊四名鎗傷陣亡又據報稱本月初七日三更官兵攻賊擊死賊番男女二十餘人又

奪石卡三處五更時賊嘯聚百餘人前來奪卡  
官兵用鎗擊退追奪得賊卡四座初八日天  
明把總胡洪道等復得半山嘴砲臺一座擊死  
賊番七名又據稟報初九日夜賊番三百餘人  
由卡卡脚小路潛來撲卡被雜谷土兵攻退叅  
將永柱乘勝於初十日發兵七路設伏是夜四  
更賊從北山來遊擊楊之義等四路伏發迎敵  
至五鼓時戎布寨內賊番出寨應賊被守備金

容等三路伏兵截殺賊向江邊奔逃守備王良  
弼堵殺九名投江者十數人七路官兵乘虛合  
攻殺死賊番甚衆連奪賊卡二十八處及大木  
城一座石戰牆一道遂克取戎布寨一所內計  
大小戰碉五十餘座官兵俱無損傷實獲全勝  
臣查馬奈官兵連次攻擊雖亦小小取勝但戎  
布一寨業經圍攻半載軍心多屬萎靡今忽得  
連勝攻克不惟賊番稍知畏懼而將士怯懦者

皆為振起即新到官兵聞之亦倍增鼓舞勇銳之志是此捷尚足激勵戎行也至新調官兵一萬名延綏甘涼肅州并雲南官兵於四月初八十二等日俱已先後抵營臣現在指路分派約於本月盡間可以齊抵賊隘哈攀龍已於本月初五日抵營岳鍾琪約本月二十日亦可抵營番境今春降雪甚大昔嶺美卧等處尚有積雪二三尺四五尺不等必至五月初旬方能融化

維時傳檄定期督催將士同日鼓勇而前仰仗  
皇上天威諒賊必不能支也奏入

諭曰此亦小小攻克耳佇待捷音以慰西顧

臣等謹按戎布本一小寨張廣泗付托非人  
遷延歲月迨後士卒久在行間積憤思奮遂  
能以數百之衆退敵成功張廣泗不自咎從  
前之急緩疎忽而轉謂此捷實足鼓勵戎行  
大言誇詡其粉飾掩著之罪深矣

是日班第奏言臣欽奉

諭旨令張廣泗將馬良柱糾衆同宋宗璋一併解京  
許應虎著回原任臣仰體

聖意原以宋宗璋馬良柱前於瞻對案內扶同欺隱  
應加重譴本無可辭然就征勦金川以來三鎮  
功罪實有不同馬良柱始帶兵千餘馳援沃日  
救熱籠寨解沃日之圍降小金川之衆乘勝克  
復孫克宗實有破竹之勢番中頗著威名嗣因

張興敗後馬良柱駐劄丹噶餉道被阻適接督  
臣移營之諭倉皇失措乘夜棄營致失軍裝砲  
位罪固莫追然猶未足掩功宋宗璋統兵黨壩  
雖無攻克亦無失事至許應虎初駐獨松失機  
失砲擅移的交又受賊愚致被圍困及改調卡  
撒又與高宗瑾商同棄營且其精力較之馬良  
柱衰老實甚督臣張廣泗原擬將許應虎嚴叅  
治罪馬良柱留營戴罪圖功及奉到



諭旨臣因詢問督臣據云惟有遵

旨辦理而已臣伏思我

皇上深居九重之上遠隔行間萬里祇憑章奏以察情形各將臨敵勇怯豈能備細稔知今馬良柱宋宗璋固有應得之罪均令解京而許應虎屢次失機轉得優游回任恐各路兵弁不識瞻對案內應審緣由或滋疑議於現在軍紀兵心似覺未協至高宗瑾人原庸懦前與許應虎同謀

棄營幸衆兵不從始止督臣本欲拏解大營叅  
究因一時乏人暫緩適因擒獲賊番生噶爾結  
迨臣回營又擒獲賊人生格是以姑留効力實  
非可用之將臣見聞既確不敢緘默謹據實密  
陳至所獲賊番生噶爾結臣與張廣泗公同訊  
問據稱係微末之人不能深悉賊內情形不比  
通使生格看來人亦甚屬不堪所云係莎羅奔  
用事頭人者乃將備虛誇故習耳奏入

上甚嘉之是日班第奏言叅將永柱近日攻克之戎  
布寨初進兵時業經降服嗣因許應虎等撫馭  
乏術苦累番民以致頭人恩錯復行附賊其時  
永柱統領漢土官兵四千餘衆圍攻數月並未  
克取適有賊番數百侵犯卡倫不思力戰屢請  
援兵又止令土兵當先堵禦以致被賊衝散佔  
踞碉卡相持月餘惟欲俟各路官兵進攻冀賊  
自退及張廣泗再三督促而各兵亦人人思戰

始一出營與賊對敵以我數百之衆奮勇直前  
賊遂披靡四散奪獲所失卡倫並乘勝攻取戎  
布寨看此情形則金酋並非勁敵舊兵不盡懦  
弱已可概見惟在將領之賞罰分明臨機調度  
去歲屢次失事揆厥所由亦無非各將領遷延  
觀望所致耳臣思永柱前雖不能無過今既小  
有攻克尚可俟事竣叙功若第據所報粉飾之  
詞即蒙

皇上優加獎賞恐各將弁不知因鼓勵起見致啓効  
尤僥倖之心於軍紀兵情頗有關係故敢據實  
直陳奏入

報聞

乙未

上命四川提督武繩謨來京陞見其員缺以岳鍾琪  
補授

平定金川方略卷六

欽定四庫全書

平定金川方略卷七

五月戊戌四川布政使倉德奏言督臣張廣泗  
添調之陝甘雲貴官兵餘丁一萬三千名內涼  
州河州官兵由茂州赴營陝西固原延綏官兵  
自棧道入川由灌縣出口雲貴官兵由成都省  
城前赴軍營添調新兵即應加增糧運臣商之  
撫臣先後雇覓背夫一萬二千餘名皆分起委

員押交總理糧務道分站安設並隨軍輓運又於成重潼順敘嘉龍瀘資眉邛綿永等十三府廳州屬倉穀內添辦軍米十二萬石勒限運赴西南兩路又添調冬倅州縣佐雜二十餘員出口聽候差委及分管隨軍辦理一切糧務現在大兵不日會集夫糧亦皆充足奏入

報聞

己亥貴州提督丁士傑奏言前派黔兵一千名

赴川協勦今據領兵將備報稱已於三月初一  
初三等日自成都出口約三月二十以前可以  
齊抵軍營官兵沿途安靜且人人踴躍奮往一  
路安吉並無疾病等事滇省官兵二千名亦已  
到川約三月二十前後可抵軍營奏入

### 報聞

甲辰班第奏言從前臺站分設夫役糧員不善  
撫綏多致畏難逃竄以虧額之夫運定限之米



自屬竭蹶是以每日到營之米僅足逐日支持  
偶為雨雪所阻便費周章臣深悉其故督令糧  
務官員應補者補應添者添善為安頓毋許官  
吏絲毫扣剋留難俾源源輸輓除最遠之甲索  
一路外其餘各營現據糧務官員揭報約足餘  
半月或二十餘日之糧可資豫備臣仍不時督  
催寧使多餘毋致不足督臣現議分兵進攻師  
行糧隨路盡崎嶇支分派別臣與各員再四講

求按道計夫尚須隨軍輓運人役數千已飭藩  
司多為雇覓現亦陸續到齊不致臨期貽誤奏

入

報聞班第又奏言岳鍾琪於四月二十日到營臣細  
訪軍中應辦事宜據云現在賞罰最宜嚴明無  
論各路番民性俱嗜利即漢兵亦須懸定賞格  
方能鼓舞倘有犯令及臨陣退縮者即以軍法  
從事不容姑息所用漢番兵丁務使各盡其長

聞向來攻戰總以番兵當前漢兵隨後遇敵惶惑相率奔潰不知番蠻所用刀桿等器止利短攻漢兵鳥鎗弓矢皆能及遠自應令漢兵居中首當其衝而以番兵分左右翼從旁夾擊乃能取勝再用番兵須釋其疑若用之而復疑之兵法所忌黨壩一路雜谷土兵最多應令挑易精銳從戰而綽斯甲為金酋後戶若賊敗北逃遁須借綽斯甲之力方可擒獲此皆宜豫為撫定

者也臣又問現在情形據云黨壩甲索專攻勒  
歪賊巢統算已有兵萬餘可以足用惟督臣議  
分兵數路進奪昔嶺以攻刮耳崖賊巢恐分兵  
勢單不無顧慮臣觀其籌議頗中肯綮於各番  
情形及金酋事宜亦能稔悉而精力尚屬強健  
似可冀其成功現據督臣與之詳加商榷所陳  
謀慮督臣亦皆允從已於四月二十三日自營  
起身前赴黨壩訖督臣始擬分兵十二路今已

歸併十路至進勦日期據督臣云探看山徑積雪尚多必須五月初旬方可會齊各路刻期進取臣亦俟督臣移營前進時同往察看情形并調度糧運奏入

報聞班第又以丁憂試用縣丞鄭琰人才可用奏請留營差委

上可其奏是日班第張廣泗會奏言臣班第奉

命來川調度糧運前在省城正值調兵增餉之時適

辦理南路糧務之打箭爐同知鮑成龍赴省即將應行添運數目交該同知遵照辦理及臣班第至軍營時南路總理建昌道陳緯亦奉調至營臣等又將一應調劑事宜俱交該道悉心條議據稱南路臺站安設已妥加運之米力任可以無誤惟木坪一路道險運難不能兼顧應令雅州府知府為副總理歸彼管轄隨據議允准奏明在案詎該道回爐之後音耗全無檄催屢

次忽據詳稱據同知鮑成龍詳請應加站若干  
應添夫若干臣等接閱之下不勝駭異查該道  
所轄南路每日運米不過二百餘石原屬無多  
即使果應加站添夫亦應於在省面見時稟明  
酌辦庶可先事綢繆乃該道該同知從前並無  
片語議及今直大軍進勦在即忽復作此更張  
豈能臨期猝辦且各路糧臺俱已查清陸續稟  
到惟該道所屬甲索一路為途最遠任催罔應

明係已有貽誤希圖混詳為藉口歸咎之地隨  
嚴加批駁飛飭趕運間適臣張廣泗差往甲索  
之兵丁回稟該處現在缺糧續據署副將王世  
泰亦具稟到臣等當查甲索舊駐之兵糧已不  
敷用今又添兵前往何以為計星委川東道齊  
格馳往相機料理務期接濟外竊思該道等面  
稟則一味模糊辦理則百端詐偽以致遲悞軍  
情難容掩飾况該道前管木坪甫請歸併雅州



管轄隨又將所管邊谷一路詳請歸併木坪種  
種委卸居心全不可問再上年臣張廣泗以西  
路草坡運道班攔山等站恐天寒雪凍運夫苦  
累商之該道於南路添買烏拉協濟該道已經  
承領添辦牛騾二千頭交該同知鮑成龍收管  
又俱全不經心入運未及月餘倒斃殆盡實屬  
貽誤軍需相應請

旨將建昌道陳緯打箭爐同知鮑成龍革職交與巡

撫一并嚴審定擬查明倒斃烏拉責令分賠以肅軍紀

丙午

上諭內閣曰據班第張廣泗奏稱建昌道陳緯打箭爐同知鮑成龍承辦糧運漫不經心所領烏拉牛騾多致倒斃陳緯鮑成龍俱著革職其廢弛糧務之處不必解交巡撫審擬如有應行訊問情節卽於軍前嚴訊明確枷號示衆俾承辦糧運之員知

所敞惕俟凱旋之日照例定擬

庚戌張廣泗奏言金川地界綿亘一溝其南北  
不及三百里東西不及二百里中有大河一道  
由北而南番人夾岸而居莎羅奔與伊姪郎卡  
所居勒歪刮耳崖二寨皆在河之東岸四面雪  
山凡可通之路皆係懸崖峭壁偏橋窄路緊要  
路口俱建有戰碇石卡層層羅列防禦嚴密上  
年進兵時因路徑查探未確是以賊酋恃其地

險碇堅敢於肆行抗拒今臣身歷軍營已幾一  
載審度形勢察訪番情已盡得其底裏現在精  
壯番賊不過四千餘人而我兵已及四萬之衆  
兵法十圍五攻賊衆我寡則宜聚賊寡我衆則  
宜分今我以十擊一就其形勢當分十路進攻  
黨壩一路原派漢土兵九千餘名今加派一千  
五百餘名委加銜總兵岳鍾琪統領由黨壩攻  
取木耳金岡康八達陡物黨噶等寨直搗勒歪

又委署松潘總兵哈攀龍統領漢土官兵三千  
餘名由美臥溝一路攻取撒臥山大松林噶達  
勒烏等寨亦直搗勒歪又派署重慶總兵任舉  
統領漢土官兵三千四百餘名直登昔嶺奪賊  
碉卡踞其要害又派候補叅將王愷統領漢土  
官兵三千餘名由昔嶺之右納喇溝攻取巴爾  
工色且等寨直趨刮耳崖又派貴州清江協副  
將唐開中統領漢土官兵三千八百餘名並餘

鎮雄營叅將劉德成統領漢土官兵二千八百  
名由昔嶺之左卡撒一路會攻色底碉寨之後  
唐開中即領兵搶奪右山梁攻取奎角干登色  
爾力等處直趨刮耳崖劉德成領兵攻取美溝  
之巴朗木須等處並分兵搶奪左山梁攻取革  
喇布東等寨亦直搗刮耳崖又派四川遊擊王  
世爵署遊擊潘文郁帶領漢土官兵一千四百  
名堵禦納貝山俟色底碉寨攻克之後即領兵

前進攻取得利曾達等寨並聲援馬奈一路官兵此進攻金川河東六路之布置也至河西有名碉寨數十處精悍賊番多在其間上年因官兵數少不能分至河西因而賊衆盡趨河東抵禦是以攻取為難今派定署秦寧協副將王世泰大同協副將高雄統領漢土官兵四千餘名由甲索一路進攻又派金塔副將劉順統領漢土官兵二千五百餘名由乃當一路進攻又派

陝西叅將永柱統領原駐馬奈之漢土官兵三千餘名由卡卡脚一路進攻使賊河西各寨不能復援河東而勒歪刮耳崖賊巢勢孤力竭自難持久此進攻金川河西四路之布置也自大兵進勦以來已將一載賊番糧盡技窮惟有嬰碣固守今時屆仲夏山雪甫消二麥將熟正當乘時進攻使賊不得刈獲則奪其食即所以絕其命且



頒發九節銅砲十位並成都製造大砲三十位俱已  
到營足資各路分用是師旅既集攻具已備臣  
與班第就近會商定期五月初八日十路大兵  
同時齊發協力並攻庶賊四面受敵雖有堅碕  
亦難再守可期仰仗

天威直搗賊巢無難矣奏入  
諭曰覽奏俱悉惟俟捷音耳

臣等謹按張廣泗有言兵合則見多分則見

少而及其用之也每主分而不主合始而四  
路既而七路今當增兵之後又擬分十二路  
後乃定為十路雖數道並進自古用兵何嘗  
不藉此奏績然不若張廣泗屢將有用之兵  
零星分散以自形其弱也方議分兵數路進  
奪昔嶺以攻刮耳崖岳鍾琪固早已憂其兵  
分勢單不無可慮矣又況兵以禦敵將以領  
兵將之與兵必如臂指之相使頭目之相護

而後可期致勝張廣泗乃將各省之兵任意分隸不歸本將統轄竟致將不識兵兵不識將何以收羣策乎

是日班第等會奏軍前設立賞格

上命軍機大臣等速議議曰金川自軍興以來已及一載有餘添兵糜餉現在自應刻奏膚功難容延緩而軍中賞罰原屬第一要務今據班第張廣泗奏稱兵丁有臨陣割獲男番首級一顆或

耳記一箇者賞銀五兩如或連割首級及耳記  
數箇者照數遞加若有生擒賊番一名者賞銀  
十兩如係寨首及小頭人賞銀二十兩如係大  
頭人及逆酋素所信任者商酌從優加賞至於  
賊人所居之碉大而難攻者每克一處賞銀三  
百兩其次賞銀二百兩又其次賞銀百兩或五  
十兩領兵員弁有能親冒鎗石身先士卒者計  
功遇缺陞補請以此為鼓勵之資冀成功之速

臣等伏思用兵之法全在賞罰分明始足以示  
勸懲而作士氣但兵丁臨陣或能奮勇爭先或  
能殺敵致果統領之員皆所目睹應加賞給原  
可隨時立辦若預定銀數零星購買不惟無此  
體制亦恐轉以滋弊如臨陣之時前有數人對  
敵兵丁貪獲賞銀衆皆爭取一人之首級耳記  
而敵兵之猛鷙凶悍者轉得乘間脫逃豈不貽  
誤況使士卒惟利是圖勢必轉無鬪志其間或

戕殺已降賊害平人或割取已死之耳記冒領  
賞銀或因利爭競而軍令不肅種種弊端未可  
枚舉在國家興師伐罪既已動費帑金原不惜  
此區區賞功銀兩即班第張廣泗亦不過為鼓  
舞兵丁起見但如前項所指各弊則事屬難行  
應無庸議至於軍營賞格關係甚重應另行斟  
酌良法俾兵丁皆知奮往直前立功奏凱庶為  
有益現今大學士訥親將次抵營應令訥親會

同班第等詳加籌酌另行速議奏

聞辦理

上是之是日

上又以軍機大臣議駁班第等賞格一摺傳示訥親  
令其閱看斟酌並傳

諭張廣泗等軍營中果有奮勇爭先出奇制勝者臨  
期酌量即從優重賞務在合宜中窳實足鼓士  
氣而勵人心是日張廣泗又奏言各鎮將分領

一軍凡屬臨敵攻戰其於主將之指授機宜務須遵聽調度而於駐軍之營壘務須妥慎防範以免疎虞未有罔遵指示擅棄營壘甚至撤營移駐並無賊尾追而軍裝砲位率皆遺棄弗顧但知畏賊而不知畏法如近日鎮將之甚者也查臣於上年六月二十八日派兵進勦原分西南二路其西路統領係宋宗璋派管黨壩卡裏等處官兵進攻勒歪卡裏一路官兵係郎建業



帶領臣原令由曾頭溝前進宋宗璋調往卡裏  
郎建業僅攻克石卡二處久頓未能寸進反致  
傷損官兵宋宗璋所領黨壩官兵上年七月攻  
克革什戎岡奪獲作固山梁尚屬奮勉自八九  
月以後進攻木耳金岡康八達兩處雖亦擊毀  
碉座究之跬步不能前進該鎮又於瞻對案內  
扶同欺罔有應訊問之處臣現遵

旨令哈攀龍前往黨壩軍營摘印署理並委岳鍾琪

前往接辦統領事務將宋宗璋解赴成都看守  
候臣委員解送刑部聽候質訊其南路統領係  
許應虎派管正地馬奈綽斯甲等處官兵夾攻  
勒歪刮耳崖該鎮初進之時克復正地攻取車  
寨尚屬勇往迨進攻獨松未克蔡允失事許應  
虎竟舍獨松而至的交以攻甲木寨仍不能克  
反被賊圍幾至危殆臣始將許應虎撤回小金  
川繼因卡撒一路未有大員彈壓又遣許應虎

至彼駐守乃畏賊大言恐嚇欲允其撤退營盤  
之請經臣嚴飭中止臣又將許應虎調回閑住  
現在留營無益應遣回建昌鎮本任辦事至馬  
良柱於上年四月救全沃日諭降小金川并克  
復孫克宗地方勞績頗著六月內克取納貝山  
江卡得利等處及招撫克州九寨并攻取噶固  
讓噶美耳等寨進據丹噶山梁亦屬奮勇及臣  
將卡裏撤回之兵令赴丹噶歸伊統轄該鎮駐

劄丹噶山雖離刮耳崖不過二十餘里而攻取  
曾達一碇日久未克迨張興失陷遂意沮氣懦  
措置乖方致令克州九寨仍被賊占大肆猖獗  
及臣令發兵退賊然後移營納貝山一帶據險  
駐劄而馬良柱一得臣檄即置賊不顧率領漢  
土官兵五千餘衆連夜移營並無賊人尾追而  
砲位軍裝帳房等項盡行遺棄其怯懦無能較  
之前此如出兩人且該鎮亦於瞻對案內扶同

欺罔應行質訊臣謹遵

旨摘取印信委副將任舉署理重慶鎮事務統領官  
兵進勦將馬良柱同宋宗璋一并解送刑部質  
訊問擬其遊擊陳上才上年四月內救援沃日  
及攻克孫克宗進據丹噶山雖有微勞但分駐  
卡撒左山梁以後毫無寸功且於撤營之時防  
範疎懈以致失砲傷兵罪實難逭叅將郎建業  
初由卡裏進兵既無寸功後赴曾達駐守失去

卡倫七座迨撤營之際不遵號令失砲傷兵其  
罪更難姑貸臣按照軍法將郎建業鎖拿解赴  
成都收禁陳上才先經患病赴成都調治咨明  
提臣武繩謨一并收禁候

旨到飭審究擬至署遊擊潘文郁於上年四月赴援  
沃日奮勇對敵身帶石傷繼又攻克孫克宗及  
得利噶固等寨皆為前鋒直抵丹噶頗屬勇往  
惟於曾達撤營急遽失去小砲一位尚屬罪不

掩功又署叅將事陝西遊擊王世泰派往馬良  
柱丹噶軍營幫辦統領事宜並無寸效又隨同  
撤營毫無布置咎亦難辭但該員委赴丹噶未  
及旬餘情稍可原且熟於金川一帶番情為綽  
斯甲等土司所素信應姑留以備差委臣現將  
王世泰潘文郁二員暫留軍營策勵以觀後效  
再查丹噶曾達及卡撒山梁等處撤營失去砲  
位所有專管之千把弁員亦干例議外委張朝

佐王國佐姜于海山陰棠王孟國五員即行按  
名斥革千把杜景賢杜啓明宋祿三員咨部斥  
革一并羈候審擬至於卡撒駐守之叅將買國  
良上年七月攻克空卡關邦噶山碉寨并克破  
卡撒大碉頗屬奮勇至八月以後攻打色底遂  
為頓阻又副將高宗瑾上年八月內奪據色底  
左山梁之後即為頓阻雖俱未能克敵尚屬固  
守無失高宗瑾於本年正月內誘擒逆番用事



頭人生噶爾結又於三月內協同副將唐開中  
叅將買國良等拿獲賊目生格由是賊番稍知  
畏懼不敢輕來侵犯現在另為派遣酌授機宜  
進攻其馬奈駐守之叅將永柱初在卡裏既赴  
馬奈均無克取亦無疎失至本年三四月與遊  
擊李璠等督率官兵擊退犯營賊番攻克戎布  
寨賊勢大挫軍威稍振亦現在指示機宜調遣  
進攻阜和營遊擊羅于朝上年七月奪取甲索

碣卡八月初旬又同王世爵攻奪對哇山賊卡  
八月以後久駐甲索未有進取亦無疎失但羅  
于朝於瞻對案內通同欺罔罪不可逭請另行  
叅劾以彰法紀奏入

上命該部議奏旋經兵部議覆許應虎業經奉

旨革職解京審擬宋宗璋馬良柱俱係已經解審之  
員應行審擬治罪羅于朝歸於瞻對案內另叅  
均毋庸置議郎建業陳上才既經該督按照軍

法鎖拿叔禁應請

旨革職審擬叅將永柱照溺職例革職可否留營効  
力出自

聖恩如蒙

俞允留營俟事竣之日該督查核功過照例辦理餘  
俱如張廣泗所奏行得

旨俞允張廣泗又奏言行軍之際全賴將領身先士  
卒其退縮無能者應加懲究謀勇幹濟者應予

獎拔庶足鼓勵戎行查川陝定例自副將以至千總凡有缺出皆由內部照例銓選臣仰懇

天恩俯念軍興暫通常格此次軍前遇有副將以下缺出准臣即於此次出師奮勇立功顯著勞績人員內揀選

題請補授以事竣之日停止倘軍前不得其人仍照例咨部推補則一變通間將弁有上進之階愈切報効之願於現在征行似有裨益奏入

上命該部議奏旋經兵部議覆准行張廣泗又以管理打箭爐稅務吏部郎中博寬緣事降調具呈願於軍營効力據情入告

上可其奏令博寬留營酌量委用張廣泗又奏岳鍾琪未到軍營之前曾具稟到臣有伊曾蒙

聖祖仁皇帝賞戴花翎之語臣以大臣罷斥起用必須另蒙

恩賜方可頂戴答之不敢壅於上

聞謹代陳明奏入

諭曰可傳旨令其戴翎是日陳宏謀奏言金川不法  
皇上特遣大臣帶領官兵分起前進以期迅速勦除

臣欽遵

諭旨將沿途夫馬預為籌備先儘驛馬合棚應付并  
調撥營馬就近協濟仍有不敷令地方官雇覓  
民間騾馬務令寬裕今

欽差內大臣班第等於五月初六日過西安省城護

軍統領烏爾登等於五月初八日過西安省城  
經略大學士公訥親等於五月初九日過西安  
省城護軍統領薩音圖等於五月初十日過西  
安省城內大臣傅爾丹等於五月十五日過西  
安省城俱係兼程前進夫馬並無貽誤理合奏  
明奏入

報聞是日陳宏謀又奏言陝省為川甘兩省孔道額  
設驛站原係按地方之衝僻差務之繁簡以定

馬匹工料之多寡如一入陝境之潼關華陰華州渭南臨潼等州縣定為極衝每站設馬八十匹及一百八匹每馬一匹日給草料銀八分五釐每馬夫一名日給工食銀五分其自鳳翔府屬之寶雞縣入棧道起至漢中府屬之寧羌州黃壩抵四川境計一十六州縣驛亦定為極衝內惟寶雞設馬六十五匹東河設馬七十六匹餘俱每站僅設馬五十匹及五十四匹每馬



一匹俱日給草料銀六分五釐每馬夫一名俱  
日給工食銀三分同一極衝驛站而夫馬工料  
多寡不同皆因潼關等處乃入陝之門戶為川  
甘兩省經由之總路寧羗等處則僅係入川之  
偏路如無軍務則寧羗等驛原可應付無誤乃  
自瞻對用兵以來寧羗各驛馳騁不遑已屬疲  
苦近因金川之役調撥官兵協濟軍餉

欽命大臣前往差使絡繹文檄交馳各該驛遞俱在

棧道之中一線羊腸站遠道險更與道途平坦  
之衝驛不同今寧羗等驛額馬僅五十餘匹而  
每起撥用動至一百數十匹現又安設腰站接  
遞軍營緊急文報驛馬更不敷用陝省遠在邊  
疆處處緊要無可抽調司驛各員墊項雇買湊  
應緊差幸無遲誤力實難支額設之馬奔馳不  
息多致勞傷所定工料又苦不給前據寧羗州  
等一十四州縣驛紛紛呼籲詳請加增工料馬

匹以免貽誤軍需臣批飭驛鹽道孫陳典會同  
布政使慧中確查議詳茲據該司道等援據雍  
正八年西路用兵之例詳請加增臣查寧羗等  
驛夫馬工料久有定制何容輕議加增惟是軍  
興之際差務殷繁疲苦實甚若不亟為調劑設  
有貽誤關係非輕伏查雍正八年西路用兵沿  
邊一帶添設邊塘馬匹所需草料銀兩前督臣  
查郎阿題明俱照八分五釐支給報銷今寧羗

等州縣棧道崎嶇當此用兵之時差務繁急與  
從前西路用兵事同一例臣等目擊各驛情形  
不得不叩懇

天恩俯准將漢中府屬之寧羗黃壩大安沔縣黃沙  
褒城青橋馬道武關留壩松林三岔鳳縣草涼  
等十四州縣驛照西路用兵添設邊塘事例於  
額設馬匹之外每站暫添馬二十匹馬夫十名  
以資應付每馬一匹無論新添舊設均照例每

日支給草料銀八分五釐馬夫一名每日支給  
工食銀五分至鳳翔府屬之寶雞東河二驛馬  
匹無庸添設其草料亦請每日支銀八分五釐  
馬夫工食每日支銀五分一應工料請於奉

旨允准之日准其開銷所需添設馬價於藩庫銀內  
照定價每匹八兩給發收領事竣之日變價還  
項夫馬工料亦仍照舊額支領奏入

上命軍機大臣等會部議曰川省現在用兵其

差務之煩較之陝省勢必更甚而川省沿途各站僅設馬三十匹每匹日支草料銀六分並未請增今陳宏謀援照雍正八年西路用兵添設塘馬之例奏請加增不知西路一帶俱係沿邊歷年原無驛站軍興之際不得不議添設並非原有額設復行增添也惟是金川現在用兵往來差使自必多於平時陝川二省馬匹或有應通融辦理之處臣等未能周知難以懸定今大

學士公訥親現奉

命赴川經略軍務身歷其境應請

勅交大學士訥親將川陝一帶驛站有無應行斟酌

變通之處妥酌具奏請

旨辦理

上從之

六月辛酉紀山奏言軍需費用浩繁先後請撥  
隣近省分及部庫銀共二百九十萬兩茲據布

政使詳稱糧餉賞需及各路輓運腳價等項需費不貲現存既屬無幾而附近之陝省又存貯無多不能屢為協濟且前借司庫酌留封貯銀三十九萬餘兩尚未歸還合無再請題撥銀一百萬兩速解來川協濟理合具題奏入

上命該部速議旋經部議在江西省撥銀七十萬兩湖北省撥銀三十萬兩共銀一百萬兩交各該撫委員星赴川省交納備用是日



上命軍機大臣等傳諭訥親曰據戶部議覆紀山所請協撥軍需銀一百萬兩合之從前所撥已將及四百萬兩此時大兵雲集日費不貲若奏凱需時餽餉將何所底止當起事之初本圖震攝遐荒為一勞永逸之計雖知其難勢不容已今勞師動衆經歷歲時而兔穴獸隅險不可攻力不能致全師取勝究將何道之從金川在蜀僻處懸巖負固陸梁本不足較但既已興師問罪徵調旁省幾徧西

南若棄此不圖無以警衆心而威蠻服番衆圍視而起其將何以禦之然自朕反覆思之命將徂征固以止亂班師柔遠是乃常經古人云不以明珠抵鵲惜其所得不償所失也為今之計果已迅奏膚功捷音踵至固不待言倘尚利害相持當籌制勝良圖可以無頓大兵而狡寇帖服不致有損國威斯為上策至班滾不過漏網遊魂無足輕重如果探囊可得亦足快心若勢不能中止又將頓師

經年更加勞費則俘班滾而懸之藁街不足示武  
且擒獲班滾特以服李質粹慶復之心明非懸坐  
疑獄耳試思傷財動衆李質粹之首果足償赤子  
百萬之脂膏耶不惟李質粹即慶復又豈足以償  
之耶以事理輕重衡之不如置之不問此朕宸衷  
密斷為民力物命起見不然多者費矣後之所費  
數豈踰前而區區是較耶訥親赴川時起程匆促  
未暇面諭及此可密行傳諭訥親令其統計全蜀

情形熟思審處伊身在軍前所見較為親切必能  
善會朕旨如此番不用兵瞻對而大兵既撤之後  
萬一餘燼復燃嘯聚生事又不得不復為撲滅以  
杜後患則又不如目前多費為事半而功倍矣其  
一一先機籌及詳悉密奏候朕裁酌張廣泗等可  
不必令知之恐致洩漏以搖惑衆聽其現在進兵  
形勢若何竚待奏報以紓遠懷大學士佳否近來  
起居步履如何隨便奏聞以慰朕意

臣等謹按興師十萬日費千金行者有荷戈  
之勞居者有輓輸之役民命物力胥闕乎是  
自古雄才大略四征弗庭固欲使絕域遐荒  
聲靈共讐然一偏於攻取好勝之私而不能  
念及於國計民生之重則未免於勞師傷財  
不戢是懼我

皇上聖德廣運舉四海內外措置於掌握之中

睿照所及徹始徹終毋固毋我邊圉弗靖固不得不

張皇六師以伸天討洎乎行師既久勞費日  
煩則重念鋒鏑是膺無非朝廷之赤子輸將  
恐後皆為草野之脂膏惻然以班師柔遠為  
懷蓋並育兼包量同天地而審機決策洞若  
神明為經略者果能善體

聖心熟思審處則膚功之奏有無俟曠日持久者矣  
癸亥

上命四川建昌鎮總兵官莽阿納前往金川軍營聽

經略大學士訥親總督張廣泗酌量委用

戊辰

上諭內閣曰據尚書班第總督張廣泗奏稱汶川縣  
典史謝應龍於莎羅奔蠢動之初奉委偵探情形  
查勘餉道其時莎羅奔三路往攻沃日逆賊方張  
而該典史能以大義開導女土司令其堅守拒賊  
一面為請援兵迫危急之時手執佩刀相誓協力  
拒守沃日因以得全及至卡撒失利鎮將欲移營

退保該典史復力阻中止且不待檄示接濟卡撒  
右山梁軍餉該典史以微末之員能知大義兼悉  
機宜實心任事甚屬可嘉即在大員中亦不易得  
非尋常勞績可比宜不次超擢以示優獎可加授  
知州同知職銜遇有相當之缺該撫即行題補使  
軍中効力人員共知鼓勵是日

上又命軍機大臣等以謝應龍超擢諭知訥親令傳  
該員面加獎諭並通傳各營使効力人員共知鼓



勵

臣等謹按行軍之際賞罰最宜嚴明典史謝應龍以微末之員一能實心任事

皇上即予超擢並諄諄傳

諭經略面加獎勵又傳播各營使効力之員共知奮勉

聖主之無功不賞無微不錄所以鼓舞人才振作其勇往之氣者至深切矣當時訥親張廣泗漫

不經心以致軍前敘功冊籍溷淆無可稽考  
豈非負

恩之大者乎

是日班第等以前奏軍前文武員弁跟役及土  
兵在本境者酌給半米半折奉

上諭以軍前最重糧餉半米半折日食倘有不敷伊  
等從何購覓何以轉稱足資食用遵

旨覆奏曰軍前文武員弁跟役原有額設定數照例

支給口糧但該員弁等隨帶之役與額定之數多有不足如總兵定例跟役二十四名副將十六名其實在隨帶人數並無如許之多向俱照額支領以餘米變價補日用之不足今酌定半米半折既省轉售之煩而食米仍無缺乏至土兵未離本境者原有該地出產炒麵糗粃足資餬口本不專藉官糧且其中殷實土司素有儲積者即令全領折價亦所樂從臣等總在隨時

隨地酌看情形加之調劑實無食用匱乏之虞  
奏入

報聞是日班第張廣泗紀山會奏言據布政司詳稱  
西南兩路添兵進勦雇用內地運夫數以萬計  
伊等遠役塞外食物昂貴所得腳價口糧僅敷  
本人度日不能兼贍家口兼之疾病逃亡又須  
另行募補民間不能永遠幫貼未免畏縮不前  
而軍糧緊急刻不容緩應請於每夫日給口糧

脚價外各先給安家銀二兩三月換班之時再給銀一兩庶糧夫無憂內顧得以踴躍從公臣等伏思我

皇上愛民如子不欲絲毫擾累奉有寬裕給發脚價之


諭旨臣等親察情形似應照該布政司所議辦理恭摺陳明奏入

上諭該部知之是日張廣泗又奏擒獲之賊目生格

生噶爾結與馬奈陣前擒獲之賊番克爾吉勞  
戎生格等五名均已處以極刑並行梟示以洩

衆忿

報聞



平定金川方略卷七